

Dus frars : raquintaziun

Autor(en): **Caduff, Leonard**

Objekttyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **38 (1952)**

PDF erstellt am: **27.05.2024**

Persistenter Link: <https://doi.org/10.5169/seals-882204>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*

ETH Zürich, Rämistrasse 101, 8092 Zürich, Schweiz, www.library.ethz.ch

<http://www.e-periodica.ch>

Dus frars

Raquintaziun da Leonard Caduff

La mumma entra quasi senza ch' ins audi, tschenta la scadiola caffe ed il taglier cun las elegidas talgias schambun ed ils dus paunets sin meisa, dat in' egliada ch' ei seigi en stivat per uorden, e banduna puspei il local.

L'ura de preit marcla en in ritmus regulau il temps che varga.

La cruna ei surtgemblaada cun cudas ligiai en curom, de format manual, cavegliai cun precisiun minuziosa. Vid la preitsissum penda in portret dil Napoleon cun siu tgau lad, la niala bass giuaden el frunt, ils egls penetrants, il nas d' evla e la levza grossa. Dus mauns pli afuns ei fitgada sin funs tgietschen-carmin la medaglia militara. El cantun denter quella e l'autra preit ei tschentada ina pegnetta scalegl che lai udir mintgaton il sguschem della lenna che brischa. Empau pli engiu ei l'entrada, sur la quala penda ina crusch lenn senza il Crucifigau. La vart giudem ei occupada dad ina commoda bassa cun quater truchets.

Sin meisa arda in candalier sularau che termaglia cun ina flammada caudia che fiera ina clarezia scarsa, mo loma sur ils fegls alvs screts tochen dem.

Ordaviert croda la secunda nevada.

Il maun cun la plema ded aur cuora senza cal per las lingias, selubend mo raras pausas, dedicadas alla reflexiun. Ils fegls s' empleinan ed il fasch vegn pli e pli aults. La scartira ei penibel exacta, sco stampada, plitost dessignada che tratga, e senza la minima aschunta de correctura.

Ei splunta ed igl esch sesarva. In buobet cun nialas brinas, dus carnets sut bratsch, entra. El porscha la manuta al frar grond ch' aulza en quei mument si' egliada.

«Con lunsch eis ussa?», empiara il pign de strusch diesch onns.

Il frar grond, pusond il dies encunter il curom della sutga, targlina cun la risposta e di: «Amiez la battaglia dil Cuolm dils Morts.» E suenter haver reflectau in amen: «En tutta malaura ha quei uffiern entschiet: ei era la vigelgia de Tschunchieismas. Nus essan vegni attaccai, quasi surpri dagl inimitg, dals alpins. Nus eran spossai, ualtri senza vivonda, cun paucas armas. Ina damaun ein ei stai davon nossa lingia. E lu ha la lutga priu siu decuors. Ina sbarrada denter duatschien umens, amiez la muntogna. Nus stevan sut l' ordra dil capitani L...»

Il frar pign stat cheu e teidla cun bucca aviarta il raquent, entochen che quel para d' esser alla fin.

«En la proxima battaglia sund' jeu vegnius blessaus e lu ei l' uiara stada finida per mei. — Lein uss entscheiver cun nossa lecziun. Sesa sin la sutga ed arva igl emprem carnet...»

Marc Alfons haveva fatg siu studi ed el havess giu la via aviarta per s' ornar cun il manti de mistral, e de daventar in um della politica e de far ina carriera d' honur. En siu ventga-quatravel onn han ils zenns dell' uiara clamau all' arma. El valeva per segirs de sesez, temeraris, decis. En la dudischavla jamna eis el vegnius el fiug, egl emprem contact direct culs alpins. Dil quart tochen il sisavel meins sa el nuot. El ei schischius el lazaret militar. Ins haveva fatg ord el in invalid ed ord siu bab, colonel della truppa della muntogna, in miert. Il bab ha survegniu il monument, el la medaglia militara. Els havevan omisdus contribuiu lur part. Marc Alfons ei staus il survivent, ed ei turnaus a casa suenter dus onns cun la penda nera sin igl egl seniester ed ina comba smardegliada. Ei era finiu cun l' honur de mistral, finiu cun la carriera, finiu cun il mund vegl. L' uiara ha buca respect, l' uiara pren buca risguard. L' uiara ha liug per ils survivors intacts, e per ils vegrantsuenter. L' uiara ha turnau il fegl alla mumma ed al frar pign. El ei turnaus a casa, ed il cudisch ha entschiet sin ina nova pagina. Mo il niev capitel dueva buca vegrantsuenter per el. Per el eran tuts ils capetels fini. Siu roman era alla fin. Suenter l' uiara entscheiva il futur, ed il present vala buc. Els eran ussa treis en la casa

agl ur dil vitg: ina vieua, in invalid ed in buobet che saveva de nuot. In buobet che saveva de nuot, che purtava il futur e ch' ignorava tgei che munti ina fossa paterna ed in frar bles-sau. Quei buobet era la primavera che flureva sin ils mirs sder-nai e las blessuras dils cors.

Treis en ina casa. La mumma ei la carezia e mantegn il ligiom denter ils cussadents, denter la regurdientscha ed il temps che daventa. Ella ha quitau e lai buca pirir las giuvnas plontas, che spetgan vivonda e plievgia.

Marc Alfons ei s' installaus el local niev e fa dubla lavur cun in egl e cun ina comba. El sa buc e vul buca sclauder sia regurdientscha cun il cuntegn nunpenetrabel. El vul buca re-tener en siu tgierp smardegliau sia regurdientscha. El scriva, ner sin alv, il cuntegn de sia cuorta existenza, che ha tschen-tau el en giuvens onns denter las retschas dils vegls, che rogan per ina bunura. Ils vègn emprems capetels stattan sin meisa, fermai el fasch pesont. Vala si' unfrenda buca quei document?

Di per di entra il scolar tier il giuven magister. A quei frar pign tonscha il frar grond tschadun per tschadun tutta sia sa-vida. Ord igl unviern sto vegnir la resurrecziun. La plonta ve-glia duei tonscher siu suc all' enfiarla giuvna e lu spetgar il buf furibund e curdar per tiara. L' enfiarla petschna duei retrer la vivonda e crescher, crescher sut il sulegl e crescher sut la plievgia. Tgi fuss la raschun ded esser, sche buca quella?

Il pignet cun ses diesch onns e sias nialas brinas che se-zaccudan giuaden el frunt sa de nuot. El fa ils survetschs alla mumma, semischeida denter ses camerats e lur cattavegnas, sto rir cu el vesa scenas hilaricas sin via, sesanfla denter ils ministrants la dumengia e fa, cu la mumma ei naven, perfin il cuschinier en cuschina.

Lu entra el tier il frar grond: «Nua steva il capitani L. du-ront la battaglia dil Cuolm dils Morts? Er' el a cavagl? Astga-va igl inimitg buca mazzar el?»

In' autra gada: «Tgei ha il general detg cu ti eras en létg ed el ha dau a ti la crusch militara? Ha el detg che ti seigies in herox?»

Pli tard: «Vegns ti mai pli sauns sco quei che ti eis staus avon l' uiara, e che ti sas ir giuado sco tschels?»

Cuort suenter: «Scrivas buca l' historia de miu bab? Pertgei has buc in portret ded el en tia stanza? Miu bab ei staus il pli valerus officier ch' ei curdaus. Plaidan ei en biars onns aunc adina de miu bab? Jeu less che miu bab fuss aunc.»

Silla fatscha dil giuven invalid era setschentada ina se-reina resignaziun, grazia ad in esser sc' in siemi senza in ligiom ed ina distincziun. El viveva ni en sesez ni per sesez, el era sc' in eremit ch' ei fugius dal tetg e dalla tiara fritgeivla. El haveva giu raschun de seremetter, pertgei la primavera continuava sper siu curtgin.

Treis personas en casa. Ina regurdientscha ed in invalid. Carezia ed ina enfiarla en flur. La plaga era cuvretga, ed il tgierp subsisteva. Il futur era s' aviarts.

Ei eran treis, e sco ina suletta existenza en quella casa. Aschia han ei continuau duront dus onns entirs. E la plaga era aunc adina cuvretga. Tut era seremess al coup dell' uiara, in frar pign ed in frar grond ed ina buna mumma.

*

La malsogna sederasava sco la pestilenza gronda, ed ils vitgs levan puspei, bandunond ils camps primavauns, daventar fossas cun tschiens cruschs alvas. «Ina malsogna che sdreina quels che s' empon de nuot», han ei detg, «ina nauscha malsogna.» Il pievel ura tier sogn Roc, igl intercessur en cass de nauschas malsognas.

Las mummas tremblan. Cu il futur ei en prighel, ei tut sc' in giug ch' ins sa gudignar e piarder. La scartira de Marc Alfons, il sribent dell' uiara, daventa lucca, s' ornescha cun tratgas sfurzadas, cun lingias sco pals, e la plema d' aur senta a passar sin ella sc' ina bova.

Si' ura marcla il temps regulau, mo siu maun marcla il secund temps, sco en ina concurrenza fatala. Ed ils fatgs s' avonzan, quels che quentan, che vegnan dumbrai.

Marc Alfons zuppegia per muments sin finiastra e mira viaden encunter il vitg, sco sch' el spetgass u temess da leu

in eveniment decisiv. El stat eri avon il portret e contempla ils egls blaus de quel della Corsica, ch' ei daventaus silenzius. La crusch militara. El vesa l' autra crusch, senza il Crucifigau, sur la sava. E tuorna sin sia sutga e scriva il proxim capetel.

Il letg pign vegn populaus. La malsogna. Suenter sis dis parta il cuort til per il santeri. Silla pintga fossa denter tontas vegn tschentau ina nova crusch, alva sco la neiv. La mumma ed il frar grond bragian, e la glieud ha compassiun cun els. Ils dus zenns pigns tunan sco cristal ed argien.

Ei tuornan a casa en dus, ina vieua ed in invalid. Ina mumma en dolur ed in frar senza frar. La mumma entra en la combra dil letg pign, cun il tapet de flurs cotschnas, e vesa ch' igl ei tut vit.

Marc Alfons sesa en sia stanza. La crusch militara ei buca pli vid la preit, lezza dorma el ravugl della tiara e spetga sin ina primavera, sin ina flurizun lontana. Il sribent dell' uiara scriva siu davos cepetel e ligia il fasch cun ina corda che rumpa buc.

Il Napoleon penda buca pli vid la preit. Ei penda nuot pli vid la preit auter ch' ina crusch cun in Niessegner sbattius, blasfemaus, cun ina cruna de spinas e perforaus dallas lontschas: in tgierp smardegliau cun plagas che stattan aviartas:

«Ecce homo», scriva Marc Alfons sin la cuviarta dil niev cudisch ch' el vegn a scriver cun letras d' amur e tristezia.